

Īsā^(a.s) Ke Baarah Shaagird

Injeel : Mattā 10:1-33

Īsā^(a.s) ne apne baarah shaagirdoñ ko paas bulaayā. Unhone unko naapaak ruhoñ se nijaat aur har tarah kī beemaarī aur takleef se shifā kī taaqat atā karī. ⁽¹⁾ Ye un baarah shaagirdoñ ke naam haiñ : Janaab Shamun (jinko log Patras bhī kahte the), janaab Patras ke bhaai janaab Andriyaas, Zabdi ke bete janaab Yaaqub, Yaaqub ke bhaai janaab Yuhannā, ⁽²⁾ janaab Filippus, janaab Baratulmaai, janaab Thomā, janaab Mattā (jo logoñ se taiks kī wasulī karte the), Halfiyaas ke bete janaab Yaaqub, janaab Tadhī, ⁽³⁾ janaab Shamun (jo Yahudiyon ke zeloṭ naam ke firqe se the), aur Yahudā Iskariyoti (wo insaan jisne Īsā^(a.s) ko dushmanoñ ke hawaale kar diyā). ⁽⁴⁾

[Pahalī baar jab] Īsā^(a.s) ne un baarah logoñ ko baahar bhejā, to unko hidaayat dī aur kahā:

“Gair-Yahudī logoñ ke yahaan mat jaanā aur n hī us shahar me jaanā jahaan Saamrī log rahte haiñ. ⁽⁵⁾ Balki tum sirf un logoñ ke paas jaanā jo raastā bhaṭak gae haiñ. ⁽⁶⁾ Tum logoñ ko ye bataao ki ‘Allaah taa’alā kī hukumat qareeb hai. ⁽⁷⁾ Tum beemaaron ko shifā denā. Mare hue logoñ ko zindagi denā aur koḍhiyon ko beemaarī se nijaat denā. Jo log gandī ruhoñ ke qabze me haiñ unheñ āzaad karnā. Tumko ye saarī taaqteñ mupht me milī haiñ to tum bhī sabko ye mupht me denā. ⁽⁸⁾

“Tum apne saath n paise le jaanā aur nā hī sonā-chaandī aur taambā. ⁽⁹⁾ Tum apne saamaan ke liye koī baig bhī mat le jaanā. Sirf unheñ kapḍoñ aur jutoñ me jaanā jo tum pahne hue ho. Tum apne saath laaṭhī bhī mat rakhnā. Kyunki ek mazdur haqdaar hai ki uskā kḥyaal rakhā jae. ⁽¹⁰⁾

“Jab tum kisī shahar yā kasbe me jao to wahaan ek laayak bande kī talaash karnā aur us shahar ko chḍne tak usī bande ke yahaan ruknā. ⁽¹¹⁾ Jab tum un logoñ ke gharoñ me daakḥil honā to unheñ salaamatī kī duā denā. ⁽¹²⁾ Agar wo log tumhaarī kḥaatirdaari karte haiñ to salaamatī un par banī rahegi. Lekin agar wo log laayaq naheen haiñ, to ye salaamatī tumhaare paas lauṭ aegi. ⁽¹³⁾ Jo koī bhī tumheñ qubul nā kare aur tumhaarī baat nā sune to wahaan se rawaanā hote waqt us jagah kī mittī ko apne paioñ se jhaaḍ denā. ⁽¹⁴⁾ Maiñ tumheñ ek haqeeqat bataatā huñ: Ākḥirat me faisle ke din us shahar ke logoñ ke saath, soḍom aur amorā^[a] me tabaah hue logoñ se bhī zyaadā burā hogā.” ⁽¹⁵⁾

[Īsā^(a.s) ne apne baarah shaagirdoñ ko taaleem dete hue kahā:] “Dekho! Maiñ tum bheḍoñ ko bheḍiyon ke beech me bhej rahā huñ. To tum saamp kī tarah hoshiyaar aur kabutar kī tarah maasum ban kar rahnā. ⁽¹⁶⁾ Hoshiyaar rahnā! Kuch log tumheñ pakaḍ kar adaalat me pesh karenge aur Yahudī log tumheñ ibaadatgaah me koḍe maarenge. ⁽¹⁷⁾ Tumko merī wajah se baadshaah aur gawarnar ke saamne le jaayā jaaegā. Wahaan tum unke aur gair-Yahudiyon ke saamne merī gawaahi pesh karnā. ⁽¹⁸⁾ Jab tumko giraftaar kiyā jae, to is baat kī fikr mat karnā ki tum kyā kahoge aur kaise kahoge. Tumko usī waqt patā chal jaaegā ki kyā bolnā hai. ⁽¹⁹⁾ Wo tum naheen bol rahe hoge; balki tumhaare parwardigaar kī taaqat tumhaare andar se kalaam karegi. ⁽²⁰⁾

“Tumhaare bhaai tumhaare khilaaf baḡaawat karenge aur tumheñ qatl karne ke liye dushmanoñ ke hawaale kar denge. Baap apne bete ko dushmanoñ ke hawaale kar degā. Bacche apne maañ-baap ke kḥilaaf ho jaaenge aur unkā qatl hone denge. ⁽²¹⁾ Merī wajah se log tum se nafrat karenge. Lekin jo ākḥir tak īmaan par qaayam rahegā wo bachā liyā jaaegā. ⁽²²⁾ Jab tumheñ kisī ek shahar me taṅg kiyā jae to tum dusre shahar me chale jaanā. Maiñ tum ko haqeeqat bataatā huñ: Tum Yahudiyon ke saare shaharoñ tak jā bhī naheen paoge aur Ādmī Kā Beṭā waapas ā jaaegā. ⁽²³⁾

“Shaagird apne ustaad se aur gulaam apne maalik se kabhī baḍā naheen ho saktā. ⁽²⁴⁾ Agar ek shaagird apne ustaad jaisā ban jae to wo hī kaafi hai. Agar ek gulaam apne maalik jaisā ban jae to wo hī bahut hai. Agar log kisī ghar ke sarparast ko “Shaitaanoñ kā baadshaah” kahne lagen to phir us ghar ke logoñ ke baare me bhī jḥuṭhī baateñ gaḍhī jaaengi. ⁽²⁵⁾

“To islie, in logoñ se zarā bhī n ḍarnā. Har wo kaam jo chḥupā kar karā jaaegā wo ākḥir me dikḥā diyā jaaegā aur jo kuch bhī is waqt chḥupā huā hai uskā raaz ākḥir me zaahir ho jaaegā. ⁽²⁶⁾ Jo baateñ maiñ tumheñ andar bataauñ, wo tum logoñ ko baahar raushnī me bataao aur jo baateñ tum apne kaanoñ me suno to unkā ailaan apne gharoñ kī chḥatoñ par chḥaḍ kar karo. ⁽²⁷⁾

“Un logoñ se khauf mat khaanā jo sirf jism ko hī maar sakte haiñ, ruh ko naheen. Tum Allaah taa’alā ke alaawā kisī aur se mat ḍarnā. Allaah rabbul azeem jism aur ruh donoñ ko Dozakh me tabaah kar saktā hai. ⁽²⁸⁾ Dekho! Chidiyā kā joḍā bahut kam paioñ me biktā hai, lekin usmeñ se ek bhī chidiyā binā Allaah taa’alā kī marzī ke naheen mar

saktī. ⁽²⁹⁾ Tumhaarā parwardigaar is baat kā bhī ilm rakhtā hai ki tumhaare sar par kitne baal haiñ. ⁽³⁰⁾ Islie beḡhauf raho. Tum bahut saarī chiḍiyon se bhī zyaadā qeemtī ho. ⁽³¹⁾ Jo bhī logoñ ke saamne merī gawaahī degā, to maiñ apne parwardigaar ke saamne uskī gawaahī duñgā. ⁽³²⁾ Lekin jo iñsaan mujhe logoñ ke saamne ṭhukrā degā, to maiñ bhī parwardigaar ke saamne use pahachaanane se inkaar kar duñgā.”⁽³³⁾

[a] Ye wo shahar haiñ ki jahañ ke logoñ ne Lut^(a.s) ke zamaane me Allaah rabbul azeem se baḡawat karī thī.
(Quraan majeed : Al-āraaf 7:80-84)